



Serangan siber ditangani, operasi PERKESO lancar

Oleh Tuty Haryanti Ahmad Rodzi - Disember 11, 2023 @ 4:07pm
bhnews@bh.com.my

KUALA LUMPUR: Kementerian Sumber Manusia (KSM) akan mengambil tindakan sewajarnya selepas mengenal pasti pihak terbabit dalam kes serangan siber yang menyasarkan infrastruktur dan imej Pertubuhan Keselamatan Sosial (PERKESO).

Menterinya, V Sivakumar, berkata semua tindakan awal sudah dilaksanakan dan keadaan semakin terkawal.

Katanya, KSM memberi jaminan pengoperasian PERKESO berjalan lancar dan pembayaran faedah kepada penerima berjalan seperti biasa manakala semua permohonan baharu akan diproses untuk kelulusan.

"Tiada masalah dalam operasi PERKESO buat masa ini dan saya yakin perkara ini akan terkawal kerana kita akan mengambil langkah sewajarnya untuk memastikan perkara seperti ini tidak berulang.

"Tindakan susulan akan diambil jika pihak terbabit dikenal pasti," katanya kepada pemberita selepas Majlis Jalinan Mesra Menteri Sumber Manusia Bersama Media di Menara Kuala Lumpur di sini, hari ini.

Turut hadir, Timbalan Menteri Sumber Manusia, Datuk Mustapha Sakmud dan Timbalan Ketua Setiausaha (Operasi) KSM, Datuk Norison Ramli.

Minggu lalu, PERKESO mengesahkan sistem, pangkalan maklumat dan laman sesawangnya diserang penggodam sejak awal bulan ini.

Sehubungan itu, PERKESO mengaktifkan pelan pengurusan krisis pada hari sama manakala unit teknologi dan komunikasi maklumat (ICT) digerakkan bagi pemulihan sistem.

Peringkat awal modus operandi serangan siber itu didakwa bertujuan melumpuhkan infrastruktur sistem PERKESO yang digunakan bagi pengoperasian sehari-hari.

Terdahulu ketika berucap, Sivakumar berkata, peranan media merangkumi arus perdana dan alternatif sangat penting serta berpengaruh dalam membentuk pemikiran masyarakat dan negara.

"Media berkembang pesat tanpa halangan sempadan dengan satu klik pada aplikasi capaian Internet, kita mampu mengetahui apa yang berlaku di seluruh dunia.

"Penyampaian maklumat oleh media yang memiliki sumber manusia terlatih dan cekap menjadi medium paling berkesan dan diyakini oleh masyarakat umum.

"Ungkapan yang mengatakan 'kuasa sebatang pena lebih tajam daripada sebilah pedang' merujuk kepada media yang mempunyai kuasa dan pengaruh terhadap kemakmuran sesebuah kementerian yang menjadi nadi pembinaan negara.

"Dengan kebijaksanaan melalui etika kewartawanan yang bertanggungjawab, segala berita yang dipaparkan mampu membentuk pemikiran masyarakat ke arah lebih positif," katanya.